



ՆՎԻՐՅԱԼ ՔԱՀԱՆԱՅԱԳՈՐԾՈՒԹՅԱՆ 40-ԱՄՅԱԿ

Լրացավ Հայաստանյայց Առաքելական Եկեղեցու Ամերիկայի հայոց արևմտյան թեմի բարեխնամ առաջնորդ գերաշնորհ Տ. Վաչե արքեպիսկոպոս Հովսեփյանի քահանայական ձեռնադրության 40 և առաջնորդության 20-ամյակը: Որպես ճշմարիտ հոգևորական Նորին Սրբազնությունը անձնդիր սպասավորն է Աստուծո և ժողովրդի: Սրբազան Հայրը Հայաստանյայց Առաքելական Եկեղեցին դիտում է որպես առանցքը մեր ժողովրդի կյանքի, այդ իսկ պատճառով քառասուն երկար ու ձիգ տարիներ Միջին Արևելքում, Եվրոպայում, Կանադայում և Ամերիկայում անձնվիրաբար ծառայել է Հայաստանյայց Առաքելական Եկեղեցուն և հայ ժողովրդին:

Սրբազան Հայրը, շնորհիվ իր իմաստուն, փոխադարձական ջերմ ու անկեղծ հարաբերությունների, խորին հարգանք ու պատիվ է վայելում Հարավային Կալիֆոռնիայի օտար հոգևոր պետերի կողմից, ինչպես նաև պետական բարձրաստիճան շրջանակներից ներս:

Դեռևս 1967 թվականի հոկտեմբերի 1-ին, Վարազա Ս. Խաչի տոնի օրը, եպիսկոպոս ձեռնադրվելու առիթով, Տ. Տ. Վազգեն Ա Ամենայն Հայոց Վեհափառ Հայրապետը իր պատգամն ու հորդորն է տալիս նորած Տ. Վաչե և Տ. Վազգեն եպիսկոպոսներին և ի միջի այլոց ասում.

«Բարձրաստիճան այս երկու հոգևորականները եկան մայր երկիր Հայաստան, իրենց ուխտը վերստին նորոգեցին Փրկչի ա. սեղանի առաջ և ձեռնադրությամբ ու ա. օծմամբ ընդունեցին աստվածային շնորհներ և վերածնված հոգիներով վերադառնում են շարունակելու իրենց քրիստոնեական և հայկական առաքելությունը, հովվելու մեր հավատացյալ ժողովուրդը հեռավոր Ամերիկայում, բաշխելու նրանց Ավետարանի լույսը, Աստուծո խոսքը կենարար, բաշխելու նրանց շնորհները և օրհնությունները, որ բխում են այս ա. Սեղանից, ու նաև ոգի ի բոլոր աշխատելու, որպեսզի մեր ժողովրդի պանդուխտ զավակները իրենց քրիստոնեական հավատքի հետ միասին պահպանեն ամուր, պահպանեն անալլալ իրենց հայկական հոգին: Որովհետև մենք դավանում ենք, որ Աստուծո իսկ տնօրինությամբ, Փրկչի իջման իսկ խորհուրդով այստեղ, ի Հայաստան աշխարհ, միաձուլվեց հայոց հավատքը, հայ ոգին հետ միասին, միաձուլվեց Հայաստանյայց Եկեղեցին հայ ժողովրդի հետ, նրանք դարձան մեկ մարմին, մեկ հոգի՝ հավետ միացյալ, հավետ անբաժան, հավետ անբաժանելի»:

Եվ Ամենայն Հայոց Վեհափառ Հայրապետը չսխալվեց:

Երիտասարդ սերնդի հայեցի ու կրոնական դաստիարակության գործում մեծ վաստակ ունի Նորին Սրբազնությունը: Նա իր ստեղծած հոգևոր մթնոլորտով, իր հայրական հոգատար վերաբերմունքով և իր հորդորներով



երիտասարդ սերնդի հոգում սերմանում է ազնվություն, մաքրակենցաղություն, մարդասիրություն և հոգացողություն այլոց նկատմամբ:

Իր ջանադիր ու անմնացորդ նվիրումի արդյունքն է այն, որ ներկայումս Ամերիկայի հայոց արևմտյան թեմի համարյա բոլոր ծովափնյա ունեն հրենց եկեղեցիները՝ իրենց հոգևոր սպասավորներով: Ուրեմն կրկին անգամ Ամենայն Հայոց Ս. Տ. Վազգեն Ա Կաթողիկոսը չսխալվեց, երբ 1971 թվականի մայիսի 20-ի իր սրբատառ կոնդակով (հմր. 705) Սրբազան Հորը ջերմորեն և սրտանց շնորհավորեց և բարի մաղթանքներ կատարեց՝ Ամերիկայի հայոց արևմտյան թեմի առաջնորդ ընտրվելու առթիվ:

«Հոգեպես մխիթարուած ենք գիտնալով թէ Կալիֆոռնիոյ թեմը, ձեր ընտրութեամբ կ'ունենայ երիտասարդ, անձնուէր ու աշխատանքի մեծ եռանդով օժտուած թեմակալ առաջնորդ մը, անհուն սիրով տոգորուած դէպի մեր Եկեղեցին և դէպի Մայր Աթոռ Սուրբ Էջմիածին: Չենք տարակուսիր, թէ ձեր իշխանութեան շուրջ համախմբելով թեմիդ հոգևոր դասը, թեմական-եկեղեցական վարչութիւնները և համայն հայ հաւատացեալները, դուք նոր շրջան մը պիտի սկզբնաւորէք՝ հոգևոր կեանքի շինութեան, եկեղեցիներու պայծառութեան, կրթական ու ազգային մշակոյթի զարթօնքի և կազմակերպուած շինարար աշխատանքի»:

Ամենայն Հայոց Վեհափառ Հայրապետը Տ. Վաչէ արքեպիսկոպոսին նշանակեց Ա. Էջմիածնի Գերագույն Հոգևոր Խորհրդի անդամ՝ հաստատելով, որ Սրբազան Հայրը իր կարողություններով ու բանիմացությամբ կընպաստի նոր ծրագրերի մշակման ու իրականացման և Հայաստանյայց Առաքելական Եկեղեցու բարեկարգման ու պայծառացման նվիրական գործին:

Հոգևոր, կրթական և ազգային գործունեությամբ զբաղվելուց բացի, Սրբազան Հայրը մեծ նվիրումով զբաղվում է նաև մտավոր ստեղծագործական աշխատանքով: Նա հեղինակ է մի շարք գրքերի, ինչպիսիք են՝ «Երգեցողութիւնք Ծննդեան», «Երգեցողութիւնք Աւագ շաբթուան» և այլն:

1990 թվականին թեև Սրբազան Հայրը բոլորեց իր վաթսուն տարին, սակայն նա այժմ էլ լի է երիտասարդական ավյունով և Աստուծո օգնականությամբ երկար տարիներ կծառայի՝ ի բարօրություն և ի ծաղկումն մեր Եկեղեցու, հայ ժողովրդի և հայ հայրենիքի:

ՎՈԼՈՂՅԱ ԱՅՐԱՀԱՄՅԱՆ

